

Punë të Rëndësishme – Pjesa 3 nga 4

Mirë se ke ardhur në pjesën e 3-të nga seria “Punë Të Rëndësishme”.

Kush është gati për të marrë një fjalë nga Perëndia sot?

Lutem që do jetë mesazh inkurajimi për ty. Sot do të shikojmë një anë tjetër kur nis një punë të rëndësishme.

Mesazhi sot titullohet:

Qëndro i Fortë Kur Has Kundërshtime.

E di çfarë dua shumë të mbash mend nga ky mesazh?

Sa herë që Perëndia të drejton në diçka të rëndësishme, të mirë, me kuptim, me bujari, me qëllim, me ndikim, prit kundërshtime, pengesa, rezistencë, pra gjëra që do të mundohen të ulin ritmin e asaj që po bën ti.

Nëse shikon historitë e Biblës për këtë gjë, do gjesh Adamin dhe Evën që po ndjekin Perëndinë, por, djalli në formën e një gjarpri del për t'i penguar ata, për të kundërshtuar atë që ka thënë Perëndia dhe i shpërqëndron nga vullneti i Perëndisë.

Moisiut i doli armik Faraoni. Davidi pati kundërshtar Goliathin. Kurse te Dhjata e Re, Jezusin e kundërshtoi Herodi që kur ishte fëmijë, pastaj farisenjtë, drejtuesit fetarë, Juda, djalli, demonë dhe gjithë ata që e urrenin.

Po Nehemia? (personi që po marrim si model gjatë kësaj historie) Ai pati Sanballatin dhe Tobian dhe shumë të tjerë që donin ta pengonin dhe e kundërshtuan.

Në këtë seri, “Punë të Rëndësishme”, po shikojmë Nehemian si model. Ai ishte një djalë i zakonshëm, që punonte si kupë-mbajtësi i mbretit Artakseks të Persisë. Ai dëgjoi për gjendjen e njerëzve të tij që jetonin 1,500 km larg por, jetonin në gjendje të mjeruar. Ai vetë jetonte në Babiloni. Kur dëgjoi, zemra iu thye për njerëzit e tij dhe kuptoi që dikush duhet të bënte diçka. “Ky dikushi mund të jem unë”, tha ai. Ai kërkoi drejtimin e Perëndisë, kërkoi favorin e tij, shkoi të takonte mbretin për t'i kërkuar nëse mund të shkonte për të ri-ndërtuar qytetin e tij. Është histori shumë e bukur.

Disa persona po e lexojnë për herë të parë historinë e Nehemias. Është libër me shumë vlera, sidomos kur ke filluar, ose do të fillosh diçka të re, një punë të re. Sepse ai është djalosh i thjeshtë që besonte se Perëndia mund ta perdorte atë për të bërë diçka që nuk ishte bërë më parë.

Kur arriti në Jeruzalem motivoi njerëzit, filloi puna për ndërtimin e murit rrethues, portat e qyteti. Portat, sepse kishte shumë porta, porta e deleve, porta e njerëzve, porta e peshkut, porta e luginës, porta e kuajve, porta e pishinës.

Ajo që ishte e bukur, ishte se po punojnë të gjithë, nuk janë muratorë dhe marangozë por po punojnë të gjithë, të frymëzuar. Ishin të gjithë aty duke ndihmuar dhe puna po ecte mirë. Portat po bëheshin mirë, dhe njerëzit po mendonin, do ia dalim më duket. Por çfarë pritet të ndodhi kur gjërat ecin mirë?

Në momentin që ti fillon të bësh diçka që i sjell lavdi Perëndisë, bëhu gati për kundërshtime.

Dhe kjo gjë i ndodh edhe Nehemias në kapitullin 4:

Nehemia 4:1-2 'Kur Sanbalati dëgjoi që ne po rindërtonim muret, u zemërua, u revoltua thellë dhe filloi të tallet me judenjët, dhe u tha përpara vëllezërve të tij dhe ushtarëve të Samarisë: "Çfarë po bëjnë këta judenj matufë? Do të fortifikohen? Do të ofrojnë flijime? A do të mbarojnë brenda një dite? Mos vallë do të ringjallin gurët e konsumuar nga zjarri i togjeve të rrënojave?".'

Matufë, të pamend, të pashpresë.

Nehemia 4:3 *'Tobiahu, amoniti, që i rrinte pranë, tha: "Le të ndërtojnë! Por në rast se një dhelpër hipën sipër, do ta rrëzojë murin e tyre prej guri!".'*

Çfarë bie në sy?

Kur bie vrulli i asaj që po bën, ngrenë kokën kundërshtarët.

Kjo mund të të ndodhë edhe ty ose po të ndodh. Ndoshta ti e ke filluar diçka të mirë, diçka të rëndësishme. Ndoshta do e fillosh këto ditë diçka për të ndikuar dikë dhe befasi dalin kundërshtarët. Ose, mund të jetë diçka e thjeshtë, nga jeta e përditshme.

Mos u habit kur has kundërshtime.

Ti u nise për në kishë, dhe në pikë të mëngjesit bën një sherr të madh me gruan/burrin, prindërit. Dhe nuk le fjalë pa thënë dhe tani je nisur për të ardhur për të adhuruar Perëndinë, në shtëpinë e Perëndisë.

Ose po mundohesh për të shlyer borxhet, merr vendimin dhe fillon një plan për këtë gjë, DHE të prishet makina, sëmuren fëmijët, thyhet telefoni.

Ose ti vendos që do të shërbesh në filan shërbesë në kishë dhe ditën që do të filloje ndodhi diçka që nuk vije dot në botë.

Ose do të bësh diçka, e ndan me dikë që ke besim dhe mendon se ajo/ai të vlerëson. Dhe ajo/ai të kthehet, po sa e trashë paske qenë, po pse ke kohë tepër ti? Pse do të merresh me këtë gjë? Dhe ta fiku gjithë vrullin ky personi që e do shumë.

Ajo që po përpiqem të them është “Mos u habit kur has kundërshtime”

Kur hedh hapa përpara ti ekspozohesh ndaj kundërshtarëve.

Çdo gjë e re vjen me kundërshtime. Çfare dimë për armikun tonë, djallin?

Djalli i lë rehat ata që nuk përbëjnë kërcënim.

Nëse po ecën më shumë sipas të ligut sesa sipas standartit të Perëndisë, ti nuk përbën kërcënim për të.

Por, në momentin që ti merr një përkushtim, hedh hapa të reja, vendos të nderosh Perëndinë, lëshohet i ligu si qeni nga zinxhiri. Nëse je duke bërë vullnetin e Perëndisë prit kundërshtime. Satani mundet ta kundërshtojë gjithë kohës punën e Perëndisë. Nëse nuk do të kesh asnjë lloj opozite, kundërshtimi, mos bëj asgjë, mos ia prish kujt, mos merr iniciativa, jeto në zonën e rehatisë. Shko dhe në kishë ndonjëherë, bëj si shpirti i mire, POR kujdes, çfarëdo që të bësh, mos u përzje që të shërbesh në kishë, mos u lut për dikë, mos jep, mos vendos të ndjekësh standartin e Perëndisë. Sepse në momentin që vendos për të bërë diçka për të ndikuar ose ndihmuar dikë, bëhesh kandidat për të hasur kundërshtime dhe opozitë.

Nëse nuk do kundërshtime, rri jashtë, rri larg, bëj qefin tënd.

Por ajo çfarë besoj unë fort për ty është që Perëndia po të sfidon për të hedhur hapa besimi. Për të shërbyer, për të dhënë të 1/10, për t’u lutur, për të ftuar dikë, për t’i treguar dikujt dashuri, jo vetëm këtu në kishë por, gjithë rrethit tënd të njerëzve.

Ti je fejuar dhe ju vendosni për të nderuar njëri-tjerin dhe do bëni marrëdhënie natën e parë të martesës dhe shkon te shtëpia e saj, vjehrra ju ka përgatit krevatin dopio. Dhe ti thua, po jo se ne kemi vendosur për ta ruajtur veten për martesë. Vjehrra dyshon dhe i thotë të bijës: “Ça ka ai, mos nuk i punon moj të keqen mami.”

Në momentin që ti vendos një përkushtim, fillon opozita.

Do të kesh kritika, njerëz që s’të pëlqejnë, që të urrejnë.

Nehemia bëhet gati, ia fillojnë punës/përkushtimit dhe vjen Sanballati dhe Tobia që mundohen ti demotivojnë.

Si reagon ndaj kritikës? Po ndaj atyre që të urrejnë, ndaj atyre që dyshojnë tek ti?

E di cila është përgjigja? Shumicën e herëve, mos reago fare sepse nuk do të të kuptojnë gjithsesi.

Nehemia këtë bën, nuk reagon, nuk iu përgjigjet, nuk e mbron veten fare ndaj tyre. Sepse, kur iu përgjigjesh, iu jep vëmendje më shumë seç duhet, iu jep fuqi më shumë kur reagon ndaj tyre. Kur nuk iu përgjigjesh, iu bien puplat. Thjesht injoroi dhe bëj punën, gjënë, përkushtimin që ke me Perëndinë. Sa herë më kanë kritikuar dhe sulmuar mua dhe gruan time, kishën tonë, shumë shumë herë.

Por, synimi ynë nuk është për të ndryshuar mendjen, apo për t'iu mbushur mendjen atyre që na kritikojnë. Synimi ynë është të bëjmë vullnetin e Perëndisë.

Shpesh kritikët janë të ulur me telefon në dorë ose me kompjuter para dhe shkruajnë lloj lloj gjërash, disa janë marrëzira totale.

Shiko, nuk është e lehtë të merresh me ta, me kundërshtarët dhe ata që të urrejnë. Dhe bëhet më e vështirë kur ata janë njerëz që i do dhe të afërt me ty.

Kështu mund të ndodhë edhe ty, ti ndjen që Perëndia po të nxit për të filluar diçka, për të hedhur një hap besimi dhe dikush që ti e do, dikush që ti ke bërë kaq shumë për të, të lëshohet me fjalë të rënda dhe dekurajuese. “Ti je kështu, ti s’je kështu.”

Ti nuk e pret nga ata, mos hiq dorë.

Kur zgjodha ti besojta Jezusit, hoqa dorë nga shumë gjëra që bëja, njerëz të fisit thonin, hajt se ca ditë dhe kthehesh aty ku ke qenë, se të njofim ne ty.

Kur fillova të shërbeja, po pse, çun i ri ti, do harxhosh jetën duke shërbyer të tjerëve? Kaq di ti, kaq je ti?

Bëhet e vështirë kur të lëshohen të gjithë. Njerëz tek të cilët ti ke besim, pret të të kuptojnë dhe mbështesin.

Ja se çfarë mund të ndodhë! Ti do hedhësh hapa për të bërë diçka të re këtë sezon, do fillosh një grup të vogël, do shërbesh në një shërbesë që ka kisha ose do fillosh diçka të re. Do ketë njerëz që do të thonë:” Kush mo, ti? Po ti ndihmo familjen tënde një herë, pastaj të tjerët. Po ti s’ke kohë të pish kafe me mua, paske kohë për të takuar të tjerët. Po ti thua ‘po lodhem,’ do shkosh të ndihmosh

ata që nuk i ke as fis asgjë. Po nuk ke lexuar Biblën një herë nga fillimi deri në fund, u bëre ti për të mësuar të tjerët. Po ti je shumë i ri, po ti je shumë i vjetër, po ti je beqar, po ti ke fëmijët tani, po ti je pa punë, po ti ke shumë punë. Po ti me gjithë këtë shkollë merresh me kishën? Po ti je pa shkollë, si merresh me kishën?!”

Kur ti hedh një hap përkushtimi, prit kundërshtime. Kjo ndodh në çdo lloj drejtimi që të përfshihesh ti, në çdo lloj shërbese, në çdo lloj ndikimi që mundohesh të sjellësh.

Ajo çfarë i kujtoj vetes dhe ty është:

Unë nuk do të ndikohem nga lëvdatat ose kritikrat.

Një pastori nga Viena, një nga pyetjet që iu bë ishte: Si merresh me kritikrat? Ai tha:

“Nuk do i lë lëvdatat të më rrisin mendjen as kritikrat që të më lëndojnë zemrën. Por ndjek vullnetin e Perëndisë.”

Këtë bënte dhe Nehemia. Ai e dinte që nuk ishte aty për t’iu dhënë përgjigje kundërshtarëve por, për të plotësuar thirrjen e Perëndisë. Kështu që në vend që të binte në nivelin e tyre, ai shkon një nivel më lart, ai i lutet Perëndisë. Ja ta lexojmë me kujdes sesi u lut Nehemia.

Nehemia 4:4 *'Dëgjo, o Perëndia ynë, sepse na përçmojnë! Bëj që të bjerë mbi kokën e tyre fyerja e tyre dhe braktisi në përbuzje në një vend robërie!'*

Shiko, kjo nuk është mënyra sesi na mëson Jezusi të lutemi.

Por, nga ana njerëzore më pëlqen kjo lutje. ‘O iu raftë kokës rrëmuja që po bëjnë.’ Nehemia nuk e ka lexuar Predikimin në Mal, sigurisht se Nehemia ka jetuar 400 e ca vjet para se të vinte Jezusi. Nuk e ka lexuar atë që tha Jezusi që po të qëlluan në një rën faje ktheji edhe tjetrën. Ai thotë: “Bjeru ti o Zot. Thyeja kokën ti o Zot.”

Nehemia 4:5 *'Mos e mbulo paudhësinë e tyre dhe mos lejo që mëkati i tyre të fshihet para teje, sepse kanë provokuar zemërimin tënd para ndërtuesve".'*

Mos ua fal mëkatet, çoji në ferr të digjen mirë aty se e meritojnë. Se po iu bien në qafë, po provokojnë zemërimin tënd, ndaj atyre që po të shërbejnë ty.

Nehemia 4:6 *'Ne, pra, i rindërtuam muret që u bashkuan deri në gjysmën e lartësisë së tyre; populli e kishte marrë me zemër punën.'*

Ne e bëmë gjysmën e punës, sepse të gjithë e kishin marrë me zemër, punonin me pasion.

Çfarë bëri Nehemia kur hasi kundërshtime? Ndaloj për t'u lutur por pastaj iu kthye punës.

Ndalo për t'u lutur—Ktheju Punës Përsëri.

Kërko zemrën e Perëndisë, pastaj puno përsëri. Ata nuk ndaluan punën që po bënin. Nuk e ulën veten sepse kishin diçka më të madhe për të bërë, vullnetin e Perëndisë.

Ndaloj për t'u lutur, por nuk e ndaloj punën. Ajo që më pëlqen te Nehemia, është se është edhe frymëror, edhe praktik në të njëjtën kohë. E do shumë Perëndinë por është edhe i punës. Ai lutej sikur çdo gjë varej nga Perëndia dhe punonte sikur çdo gjë varej nga ai.

Lutu sikur çdo gjë varet nga Perëndia, puno sikur çdo gjë varet nga ty.

Besoj që disa nga ju duhet të bëhen më pak frymëror dhe më shumë punëtorë. Aq sa mund të jetë dikush tjetër që duhet të bëhet më shumë frymëror dhe më pak punëtor. Duhet të dyja bashkë.

Kemi nevojë për ty o Perëndi, na drejto në hapa, ama ne do bëhemi copash në pjesën që na takon neve. Na drejto o Perëndi, se ne jemi gati, i kemi përveshur mëngët për punë.

Kemi nevojë për fuqinë tënde por, e kemi kapur lopatën. Kemi nevojë për hirin tënd dhe do bëjmë çfarë pune të më thuash ti.

Do ndaloj të lutem por pastaj nuk do të heq dorë, do i futem punës.

Ndërkohë, ja se çfarë ndodh:

Nehemia 4:10 *'Por ata të Judës thoshin: "Forcat e mbartësve të peshave vijnë duke u pakësuar dhe gërmadhat janë aq të shumta sa nuk do të arrijmë të ndërtojmë muret!'*

Filloi progresi, po ecën puna por edhe dekurajimi. Dhe kështu ndodh kur fillon të bësh vullnetin e Perëndisë.

Shikon pak progres, pastaj fillojnë kritikën.

Nehemia 4:11 *'Përveç kësaj kundërshtarët tanë thoshin: "Ata nuk do të dinë dhe nuk do të shohin asgjë, derisa ne do të sulemi në mes të tyre dhe do t'i vrasim; kështu do të bëjmë që të ndërpriten punimet".'*

Do të na vrasin, janë bërë shumë, do ngelet puna e Perëndisë pa bërë. Do mbyllet kisha, ka shumë kundërshtarë, ka shumë që e urrejnë, ka shumë opozitë, iku dhe kjo punë.

Nehemia 4:12 *'Por kur judenjtë që banonin pranë tyre erdhën dhjetë herë rresht për të na thënë: "Ngado që të ktheheni, do të na sulen".'*

Çfarë po ndodh? Filluan duke dyshuar skuadra e Nehemias, shokët e ngushtë të tij, njerëzit e tij. Nga frika e kundërshtarëve po dyshonin edhe në aftësitë e tyre.

Shiko, nuk e di si ndodh me ty POR, çdo lloj kundërshtimi, nga ata që të urrejnë, nga i ligu, nga ata që të duan, nga ata që i njeh, nuk janë gjë para kundërshtimit tënd të brendshëm.

Puna merr për ters, kur ngrenë kokën pasiguritë e tua të brendshme. Kur fillon e mendon, 'Po unë kush jam? Kot jam! Pse, s'e di unë se kush jam? Ku ia them unë për këtë gjë, kot i bëj qejfin vetes!'

Nuk e di se për kë është kjo që do them tani POR, ka ditë që ti dëgjon më shumë zërin e pasigurive të brendshme, sesa zërin e Perëndisë. Mos e ngri dorën.

Mbaj mend këtë:

Kundërshtimet e jashtme do jenë aq të mëdha saç janë pasiguritë tona të brendshme.

Si duket kjo thënia?

Prandaj ti duhet të shkosh një nivel më lart, të shikosh te Perëndia, ti mbash sytë te Jezusi, autori i besimit tonë.

Kështu bëri dhe Nehemia.

Nehemia 4:14 *'Mbasi e shqyrtova situatën u ngrita dhe u thashë parisë, gjyqtarëve dhe pjesës tjetër të popullit: "Mos kini frikë nga ata! Kujtoni Zotin e madh dhe të tmerrshëm dhe luftoni për vëllezërit tuaj, për bijtë dhe bijat tuaja, për bashkëshortet tuaja dhe për shtëpitë tuaja!".'*

Çfarë bën Nehemia? E largon vëmendjen nga gjërat dhe kalon te Perëndia dhe thotë: "Kjo nuk është beteja jonë, kjo betejë i takon Zotit. Perëndia është me ne, është për ne. Ai nuk do të na lërë vetëm në këtë gjë, sepse është gjëja e Tij, është thirrja e Tij.

Kur ecim me Të, fuqia e Tij na mbush, dhe është më e madhe se fuqia e kësaj bote. Nuk fokusohem çfarë thonë kundërshtarët, kujtoj se çdo gjë është e mundur me Perëndinë.

“Kujtoj dorën e Perëndisë. Kujtoj kur u luta për 4 muaj rresht, kujtoj kur Perëndia më tha favor para mbretit dhe më dha çfarë më duhej. Kujtoj që e fillova me asgjë. Kujtoj sesi siguroi Perëndia. Kujtoni Zotin, Perëndinë.”

Sa më i madh kundërshtimi, aq më e madhe do të jetë mbështetja e Perëndisë, sepse Ai do të luftojë për ty.

Sa më e keqe të duket situata, aq më e madhe do jetë mrekullia që do të bëjë Perëndia. Kujtoni Zotin, Perëndinë.

Nehemia 4:14 *'Mbasi e shqyrtova situatën u ngrita dhe u thashë parisë, gjyqtarëve dhe pjesës tjetër të popullit: "Mos kini frikë nga ata! Kujtoni Zotin e madh dhe të tmerrshëm dhe luftoni për vëllezërit tuaj, për bijtë dhe bijat tuaja, për bashkëshortet tuaja dhe për shtëpitë tuaja!".'*

Kujto se Perëndia po lufton për ty, është në anën tënde. Kujto Perëndinë, ai do të japë fjalët e duhura, punën e duhur, lidhjen e duhur, favorin e duhur. Kujto Perëndinë që do sheshojë tensionet e martesës tënde, shkollës, punës tënde.

Kujtoni Perëndinë, Ai do të luftojë për ty dhe fëmijët tuaj.

Kujto se do të hasësh kundërshtime nëse do bësh diçka me vlerë!

Nëse nuk jam gati të has kundërshtime për hir të bindjes ndaj Perëndisë, nuk jam gati që Perëndia të më përdorë.

Perëndi, më bëj gati. Më ndihmo të kuptoj thirrjen time, më ndihmo të bëj atë që do Ti. Kujto Perëndinë dhe çohu e lufto.

Çfarë bëri Nehemia kur pa diçka që i theu zemrën? Çfarë të bësh ti kur shikon diçka që të bezdis, nuk shkon, nuk duhet të jetë kështu? Ulesh edhe qan, e lejon që të ta thyejë zemrën, bie në gjunjë edhe lutesh, kërkon favorin e Perëndisë. Çohesh dhe bën diçka.

Pastaj ndërsa Perëndia të drejton hapat e tu, çfarë bën ti? Kërkon Perëndinë rregullisht.

E përcakton qartë vizionin, se çfarë do të bësh.

Bën plane me kujdes, me hapa praktik.

Frymëzon njerëzit për të ndërtuar një ekip, skuadër.

DHE kur armiqtë, ata që të urrejnë ose kundërshtojnë, mundohen që të ulin ritmin, kujto Zotin, Perëndinë tënd, dhe lufton për atë që të ka besuar Perëndia.

Nuk dorëzohesh. Nuk lodhesh së bëri më të mirën, sepse në kohën e duhur ajo do të japë fryte.

Vazhdo të ndërtosh. Gur, gur bëhet mur.

Qëndron besnik sot, qëndron besnik edhe nesër, ditë pas dite, javë pas jave, me fuqinë që të jep Perëndia do e rindërtosh murin. Perëndia mund të të përdorë ty, mos e lër zhurmën e kundërshtarëve të të pengojë, të të ndalojë, të ulësh ritmin, të të shpërqëndrojë, sepse Ai që është me ty, është më i madh se ai që është në këtë botë. Ti ke fuqinë e Frymës së Shenjtë, hidhe hapin.

Lutemi.